

**PEMBERITAHUAN PERTANYAAN LISAN
DEWAN NEGARA MESYUARAT KETHREE, PENGGAL KEEMPAT
PARLIMEN KETIGA BELAS**

PERTANYAAN : LISAN

TARIKH : 19 Disember 2016

SOALAN

Dato' Haji Abdul Rahman bin Mat Yasin minta MENTERI PEMBANGUNAN WANITA, KELUARGA DAN MASYARAKAT menyatakan langkah Kerajaan untuk memantapkan institusi keluarga di Negara ini khususnya bagi membendung salahlaku sosial dan keruntuhan moral anak-anak akibat kegagalan institusi keluarga seperti penceraian dan kebebasan pergaulan.

JAWAPAN

JAWAPAN: YB DATO' SRI ROHANI ABDUL KARIM, MENTERI PEMBANGUNAN WANITA, KELUARGA DAN MASYARAKAT Tuan Yang Dipertua, Mulai tahun 2016, Kementerian Pembangunan Wanita, Keluarga dan Masyarakat melalui Lembaga Penduduk dan Pembangunan Keluarga Negara (LPPKN) telah memperkenalkan program yang memberi fokus kepada pengukuhan institusi keluarga dan komuniti melalui Program Pemerdayaan Keluarga dan Komuniti atau singkatannya (FACE: Family and Community Empowerment). Di peringkat permulaan, program ini akan dilaksanakan di 14 komuniti terpilih seluruh Malaysia dan akan diperluaskan sepanjang tempoh lima tahun RMK-11. Program FACE bermatlamat memperkasa komuniti untuk mengukuhkan kesejahteraan institusi keluarga melalui objektif berikut; i. Mengenal pasti keperluan setempat dan tahap kesejahteraan keluarga di kawasan terpilih berdasarkan kepada skor Indeks Kesejahteraan Keluarga (IKK); ii. Memperkasa mekanisme sosial dalam komuniti sedia ada dengan tanggungjawab sebagai 'Family Champion' berdasarkan Indeks Kesejahteraan Keluarga; dan iii. Mengenalpasti program intervensi untuk meningkatkan tahap kesejahteraan keluarga. Mengambil model dan rangka program FACE, pelbagai kursus pemantapan keluarga seperti SMARTSTART, Parenting@Work, IlmuKeluarga@LPPKN dan program PEKERTI turut dilaksanakan kepada komuniti sasaran tersebut demi memastikan institusi keluarga kekal kukuh. KPWK melalui LPPKN juga akan berkolaborasi dengan agensi lain termasuk NGO bagi melaksanakan inisiatif untuk menangani isu sosial remaja dan perceraian. Untuk makluman, Program SMARTSTART telah dijalankan kepada pasangan yang akan dan baharu berkahwin (tempoh kurang 5 tahun) sejak tahun 2006 bagi mengukuhkan hubungan suami isteri yang memberi penekanan kepada aspek "Alam Keibubapaan" dan "Menangani Tekanan dan Konflik". Bermula tahun 2006 hingga Oktober 2016, sejumlah 623 program telah dilaksanakan dengan kerjasama Jabatan Pendaftaran Negara, Pertubuhan Bukan Kerajaan (NGO) dan badan-badan agama. Program ini telah memberi manfaat kepada 24,734 orang. Sejak tahun 2007 lagi, LPPKN telah menyediakan program Keluarga@Kerja (Parenting@Work) khusus untuk ibu bapa bekerja, sama ada di sektor awam atau swasta. Matlamat utama adalah untuk memberi kemahiran dalam mengimbangi antara tanggungjawab kerja dengan keluarga (work life balance) sebagai ibu bapa dan pekerja. Antara aspek yang diberi tumpuan ialah cara gaya keibubapaan kreatif dan pengurusan konflik khususnya masalah interpersonal yang mana diharap dapat meningkatkan kemahiran ibu bapa dalam menangani situasi berisiko. Sejak tahun 2007 hingga Oktober 2016, sejumlah 821 program telah dilaksanakan oleh LPPKN dengan kerjasama NGO melibatkan penyertaan seramai 34,047 orang ibu bapa daripada sektor swasta, GLC dan agensi kerajaan. Bagi mengatasi konflik dan meningkatkan kemahiran pengurusan rumah tangga yang lebih berkesan, LPPKN telah melaksanakan kursus 'Ilmu Keluarga@LPPKN' yang diadakan secara bulanan di setiap negeri kepada masyarakat umum. Sejak tahun 2006 hingga Oktober 2016, sejumlah 13,691 kursus telah diadakan yang berjaya menarik penyertaan seramai 1,584,118 orang peserta. Pelaksanaan kursus ini berasaskan kepada Pakej Modul KASIH yang mengambil kira kitaran hidup dan merangkumi aspek keibubapaan ditahap anak kecil, remaja, kebapaan dan pemantapan perkahwinan. LPPKN juga menyediakan perkhidmatan kaunseling rumah tangga, individu, kelompok dan lain-lain bagi membantu peserta mengurus stres dan mempelajari kemahiran menyelesaikan cabaran kekeluargaan demi kesejahteraan diri dan keluarga. Sejak tahun 2006 sehingga Oktober 2016, sebanyak 45,659 sesi telah dijalankan kepada 112,257 klien. Disamping itu bagi program pembangunan remaja, melalui Dasar dan Pelan Tindakan Kesihatan Reproduktif dan Sosial Kebangsaan (PEKERTI) 2009 yang diperkenalkan beberapa program telah dilaksanakan merangkumi; i. Penubuhan PUSAT REMAJA kafe@TEEN, ii. Pembangunan Modul Cakna Diri dan Modul Kesejahteraan Hidup iii. Perlaksanaan PROGRAM PEKERTI@Sekolah, PROGRAM PEKERTI@Institut, PEKERTI@IPGM dan PEKERTI@KOMUNITI Kementerian percaya dengan segala langkah dan inisiatif yang diambil secara bersama di antara agensi Kerajaan, Pertubuhan Bukan Kerajaan (NGO) dan komuniti masyarakat dapat membendung fenomena salah laku sosial dan keruntuhan moral anak remaja.

